

**Հետազոտական աշխատանքների իրականացումից եվ գնահատումից
ուսանողների բավարարվածության հարցման արդյունքների վերլուծություն
(2024-2025 ուստարի)**

22. 05. 2025

Ելնելով Մասնաճյուղի ռազմավարական նպատակներից՝ Կրթական բարեփոխումների և որակի ապահովման բաժինն իրականացրել է 2024-2025 ուստարում մասնաճյուղի 4 ֆակուլտետների 34 մասնագիտական դասընթացների շրջանակներում իրականացված 4-րդ կուրսերի ուսանողների (1-ին կիսամյակ) հետազոտական աշխատանքների կազմակերպման վերլուծություն:

Հարցման նպատակն է՝ բացահայտել հետազոտական աշխատանքների իրականացման ընթացքում ուսանողների մոտ ի հայտ եկած խնդիրները, հավաքագրել առաջարկներ հետազոտական աշխատանքների կազմակերպման և իրականացման բարելավման ուղղությամբ, գրանցել նախորդ կիսամյակի հետ համեմատության դինամիկան, ակտիվացնել ուսանողների մասնակցությունը հետազոտական աշխատանքներին և խթանել ուսանող – բուհ համագործակցությունը:

Հարցաշարը ներառել է հարցեր, որոնց միջոցով նպատակ ենք ունեցել պարզելու ուսանողների բավարարվածությունը.

1. հետազոտական աշխատանքների բովանդակությունից և ռեսուրսներից,
2. կատարած աշխատանքից,
3. հետազոտական աշխատանքների կազմակերպումից,
4. հետազոտական աշխատանքների գնահատումից:

Հարցման օբյեկտիվության և ուսանողների անկաշկանդ մասնակցության նկատառումներով հարցումն իրականացվել է անանուն և առցանց եղանակով: Հարցման իրականացման և ուսանողների ակտիվ մասնակցության ապահովման համար բաժինը համագործակցել է դեկանատների և ուսանողական կառույցների ներկայացուցիչների

հետ: Հարցմանը մասնակցել են հետազոտական աշխատանք իրականացրած 154 ուսանողներից **86-ը (56%)**, որը այնքան էլ բարձր ցուցանիշ չէ:

Հարցման արդյունքները հավաքագրվել և վերլուծվել են Կրթական բարեփոխումների և որակի ապահովման բաժնի կողմից:

Այժմ ներկայացնենք առանձին գործընթացների վերաբերյալ հարցման ամփոփ արդյունքները և դրանց վերլուծությունը:

Գնահատման 5 միավորանոց համակարգում՝ հետազոտական աշխատանքի իրականացումից ուսանողների բավարարվածությունը ֆակուլտետներում տատանվել է **4.4 – 4.8 (նախորդ ուստարի՝ 4.3 - 4.9)**, ընդհանուր մասնաճյուղում բավարարվածության միջին գնահատականը կազմել է **4.6 (նախորդ ուստարի՝ 4.5)**: Արդյունքը գահացնող է և փաստում է մասնաճյուղի հետևողական և բարձր մակարդակի գործունեությունը:

Հետազոտական աշխատանքների իրականացման նպատակներն են ուսանողների մոտ զարգացնել մասնագիտական անհրաժեշտ հմտություններ՝ գործնական կիրառության, թիմային համագործակցության, տվյալների հետ աշխատելու, վերլուծելու և եզրահանգումներ կատարելու տեսակետից:

Հարցումների արդյունքների հիման վրա կարելի է պարզել, թե հետազոտական աշխատանքների ինչպիսի ազդեցություններ են տեսել ուսանողներն իրենց վրա:

Ցուցանիշ	Տոկոս (%)	Վերլուծություն
Նոր գիտելիքներ	26%	Հետազոտական աշխատանքը նպաստել է ուսանողների տեսական գիտելիքների հարստացմանը, ակադեմիական աշխարհայացքի ընդլայնմանը:
Գործնական կարողություններ	21%	Ուսանողները ձեռք են բերել տվյալների հավաքման, պլանավորման, թիմային աշխատանքի և ժամանակի կառավարման հմտություններ՝ կապ ստեղծելով ուսումնառության և իրական կյանքի միջև: Մա բարձրացնում է ուսանողների գործնական պատրաստվածության մակարդակը:
Մասնագիտական հմտություններ	17%	Հետազոտական աշխատանքների պատրաստման գործընթացը նպաստել է կոնկրետ մասնագիտական գործիքների և մեթոդների տիրապետմանը ուսանողների մոտ ձևավորելով մասնագիտական հմտություններ:
Վերլուծելու կարողություններ	15%	Ուսանողների մոտ զարգացել է տեղեկատվությունը համադրելու և դասակարգելու ունակություն, ինչը կարևոր է ուսումնական և

Ցուցանիշ	Տոկոս (%)	Վերլուծություն
		գիտական աշխատանքի համար: Սակայն այս հմտությունը դեռ ունի լրացուցիչ զարգացման կարիք:
Դատողություններ և եզրակացություններ կատարելու ունակություններ	12%	Ելնելով համեմատաբար ցածր ցուցանիշից, կարելի է եզրակացնել, որ ուսանողները որոշ չափով դժվարանում են ճիշտ եզրակացություններ անել, ինչը կարող է պայմանավորված լինել մեթոդաբանական գիտելիքների պակասով:
Ինքնուրույն աշխատելու ունակություններ	10%	Ուսանողների մեծ մասը ձեռք է բերել ինքնուրույնության փորձ, ինչը շատ կարևոր է հետագա մասնագիտական զարգացման համար:

Ամփոփելով հետազոտության արդյունքների վերլուծությունը համեմատաբար առաջընթաց գրանցվել է նոր գիտելիքների ձեռքբերման (26%), գործնական կարողություններ (21%) և մասնագիտական հմտություններ (17%) ցուցանիշների մասով: Սակայն վերլուծելու կարողությունները (15%), դատողություններ և եզրակացություններ կատարելու ունակությունները (12%) և ինքնուրույն աշխատելու ունակությունները (10%) դեռևս բարելավման կարիք ունեն:

Առաջարկներ.

Ուսանողների վերլուծելու կարողությունները զարգացնելու համար անհրաժեշտ է կազմակերպել գործնական սեմինարներ, որտեղ ուսանողները կսովորեն տեղեկատվության վերլուծության մեթոդներ՝ համեմատում, ընդհանրացում, խմբավորում: Դատողություններ և եզրակացություններ կատարելու ունակությունները բարելավելու համար անհրաժեշտ է պարբերաբար հանձնարարել առաջադրանքներ, որոնցում ուսանողը պետք է փաստերի հիման վրա ձևավորի եզրակացություն, հիմնավորի տեսակետներ, կազմակերպել քեյսերի վրա դասընթացներ և դերային խաղերի ֆորմատով քննարկումներ, որտեղ ուսանողը պետք է պաշտպանի կամ հակադարձի որևէ տեսակետ՝ հիմնավոր կերպով:

Ինքնուրույն աշխատելու ունակությունները զարգացնելու համար անհրաժեշտ է ուսանողներին բաժանել թիմերի՝ սահմանափակելով դասախոսների ուղղորդումը, փոխարենը տրամադրել գործիքներ (ուսումնասիրության ուղեցույցներ, ձևանմուշներ),

յուրաքանչյուր ուսումնական առարկայի շրջանակում ուսանողներին տալ անհատական առաջադրանքներ՝ հստակ վերջնաժամկետով:

Առանցքային հարցերի վերլուծություն

1. Հարց. «Իրականացման տեսանկյունից Ձեզ համար ի՞նչ չափով էր բարդ հանձնարարված հետազոտական աշխատանքը»,

- 76% – «Ընթացքում շատ նոր բաներ սովորեցի»
- 24% – «Հեշտությամբ կատարեցի աշխատանքը»
- 0% – «Այդպես էլ մինչև վերջ չկարողացա հաղթահարել»

1. «Ընթացքում շատ նոր բաներ սովորեցի» – 76%

Սա վկայում է, որ հետազոտական աշխատանքներն ունեցել են ուսուցողական մեծ պոտենցիալ, նպաստել են նոր փորձի, գիտելիքների և կարողությունների ձեռքբերմանը: Աշխատանքը չափազանց հեշտ չի եղել, այլ պահանջել է ջանք ու ներգրավվածություն՝ ինչն էլ կրթական առումով արդյունավետ է:

2. «Հեշտությամբ կատարեցի աշխատանքը» – 24%

Այս խմբի ուսանողները հետազոտական աշխատանք կատարելիս չեն հանդիպել բարդությունների, հավանաբար՝ արդեն ունեցել են որոշակի փորձ կամ ինքնուրույնություն: Սակայն այստեղ կարելի է ենթադրել նաև, որ որոշ ուսանողների համար առաջադրանքը եղել է չափազանց հեշտ:

3. «Այդպես էլ մինչև վերջ չկարողացա հաղթահարել» – 0%

Այստեղ ունենք բարձր ցուցանիշ. այն վկայում է, որ հետազոտական աշխատանքը ուսանողների համար հասանելի է եղել, չնայած իր բարդությանը, կարելի է եզրակացնել, որ այստեղ ապահովվել է դասախոսների ուղեկցող դերակատարությունը:

2. Հարց. «Ծանոթ եք եղել գնահատման չափանիշներին» » ուսանողների մեծամասնությունը նշել է «Այո»

- 94% – «Այո»
- 6% – «Ոչ»

Սա խոսում է այն մասին, որ մասնաճյուղը արդյունավետ կերպով տեղեկացրել է ուսանողներին աշխատանքների գնահատման չափանիշների մասին:

3. Հարց. Բավարարվա՞ծ եք արդյոք հետազոտական աշխատանքի համար ձեր ստացած գնահատականից.

Հարցման արդյունքներով.

- 95.1%-գնահատականը համապատասխանում է իրենց կատարած աշխատանքին
- 3.7% – գնահատականը նույնիսկ բարձր է իրենց սպասումներից
- 1.2%-գնահատականը չի համապատասխանում իրենց կատարած աշխատանքին

Հարցման արդյունքներից կարելի է եզրակացնել, որ ուսանողների մեծամասնությունը (95.1%) իրենց ստացած գնահատականը համարել են օբյեկտիվ և համարժեք, այսինքն գնահատման համակարգը ուսանողների համար հասկանալի է ու ընդունելի, նրանց և դասախոսների միջև գնահատման պատկերացումները համընկնում են: Ուսանողների 3.7%-ը թեև գոհ են ստացած գնահատականից, այնուամենայնիվ՝ սպասում էին ավելի ցածր արդյունքի, ուսանողների շատ քիչ մասն է (1.2%) դժգոհություն հայտնել, որ գնահատականը համարժեք չի եղել իր կատարած աշխատանքին (ՏԳՖ-1 ուսանող):

Ուսանողները գնահատել են իրենց կատարած աշխատանքը՝ հետևյալ չափանիշներով.

- **Աշխատանքի նպատակի և խնդիրների ձևակերպում – 64%** (նախորդ ուստարի՝ 55%) - Սա համեմատաբար ցածր ցուցանիշ է, ինչը նշանակում է, որ ուսանողները դժվարանում են հստակ ձևակերպել իրենց հետազոտության նպատակն ու խնդիրները: Հետազոտողների համար բարդությունը կայանում է նրանում, որ պահանջում է տեսական գիտելիքների ու հստակ մտածողության համադրում:
- **Թեմայի արդիականության գնահատում – 73%** (նախորդ ուստարի՝ 59%) - Ուսանողներն ընդհանրապես կարողացել են տեսնել թեմայի կիրառելիությունը ու

արդիականությունը, ինչը խոսում է՝ գիտական հետաքրքրության ձևավորման մասին:

- **Տեղեկատվության հավաքագրում – 70%** (նախորդ ուստարի՝ 64%) - Համեմատաբար լավ ցուցանիշ է, ինչը ցույց է տալիս, որ ուսանողները կարողացել են գտնել համապատասխան աղբյուրներ, սակայն դեռ կան խնդիրներ՝ աղբյուրների ընտրության և վերլուծության առումով: Այս չափանիշի հետ կապված նաև բաց հարցերում ուսանողները նշել էին, որ ունեն խնդիր նյութերի անհասանելիության հետ կապված:
- **Արդյունքների ներկայացում – 74%** (նախորդ ուստարի՝ 70%) -սա նշանակում է, որ ուսանողները հիմնականում կարողացել են ճիշտ և կառուցվածքային ձևով ներկայացնել իրենց հետազոտության վերջնական տվյալները և արդյունքները: Սա վկայում է նաև խմբագրական կամ մեթոդաբանական աջակցություն ստանալու մասին:
- **Եզրակացության ձևակերպում – 80%** (նախորդ ուստարի՝ 67%) - սա ամենաբարձր ցուցանիշն է, ինչը վկայում է այն մասին, որ ուսանողները կարողացել են ամփոփել, վերլուծել տվյալները և անել հետևություններ:

Եզրակացություն.

Ելնելով հարցման արդյունքներից կարելի է եզրակացնել, որ ամենաբարձր արդյունքները գրանցվել են եզրակացության ձևակերպման, արդյունքների ներկայացման և թեմայի արդիականության գնահատման ոլորտներում:

Ուշադրություն պետք է դարձնել հատկապես նպատակների և խնդիրների ձևակերպմանը, որը ընդհանուր առմամբ այնքան էլ վատ ցուցանիշ չէ, բայց համեմատաբար ավելի ցածր տոկոս ունի առավելագույն միավորների տեսանկյունից:

Հարկ է նշել, որ 2024-2025 ուստարում ուսանողների կողմից իրականացված հետազոտական աշխատանքների ինքնուրույն վերլուծությունը վկայում է որակապես ավելի բարձր արդյունքների մասին՝ նախորդ տարվա համեմատությամբ: Մասնավորապես՝ հինգ հիմնական հմտությունների բոլոր ցուցանիշները (նպատակի և խնդիրների ձևակերպում, թեմայի արդիականության գնահատում, տեղեկատվության

հավաքագրում, արդյունքների ներկայացում, եզրակացության ձևակերպում) 2024-25 ուստարում գերազանցում են նախորդ ուստարվա համապատասխան ցուցանիշներին:

Սա կարևոր դրական միտում է, որը վկայում է, որ ուսանողները ոչ միայն ինքնուրույն են աշխատել, այլև հնարավոր է, որ իրականացված մեթոդական կամ կազմակերպական բարելավումներն արդյունք են տվել, ինչպես նաև հետևանք է մասնաճյուղի կողմից գործընթացի իրականացման պարբերաբար վերանայվման և բարելավման:

4. Հարց. Գնահատե՞ք դասախոսի աջակցությունը

Ուսանողները գնահատել են դասախոսի աջակցությունը տարբեր փուլերում.

- **Թեմայի ընտրություն – 81%** (նախորդ ուստարի՝ 65%)

Սա բավականին բարձր ցուցանիշ է և վկայում է այն մասին, որ դասախոսները իրենց աջակցությունն են ցուցաբերել ուսանողներին՝ թեմաների ընտրության հարցում:

- **Հետազոտական մեթոդների ընտրություն – 71%** (նախորդ ուստարի՝ 60%)

Չնայած դասախոսների աջակցությունն այս փուլում փոքր-ինչ ցածր է, բայց այնուամենայնիվ այն բարձր է, ինչը վկայում է մեթոդաբանական խորհրդատվության առկայության մասին:

- **Վերլուծությունների իրականացում – 72%** (նախորդ ուստարի՝ 59%)

Սա վատ ցուցանիշ չէ և փաստում է դասախոսների ներգրավվածության մասին:

- **Գրականության և մեթոդական նյութերի ընտրություն – 74%** (նախորդ ուստարի՝ 59%)

Ուսանողները հիմնականում գոհ են տրամադրված նյութերից և գրականության հղումներից, սակայն որոշ ուսանողների համար տեղեկությունները բավարար և հասանելի չեն եղել:

- **Աշխատանքի արդյունքների ձևակերպում – 75%** (նախորդ ուստարի՝ 60%)

Սա կրկին ցույց է տալիս, որ ուսանողները ստացել են համապատասխան ուղղորդում աշխատանքի ավարտման փուլում:

Ամփոփելով, կարելի է եզրակացնել, որ արդյունքները գոհացուցիչ են, դասախոսների աջակցությունը հետազոտական աշխատանքի ընթացքում գնահատվել է բավականին բարձր բոլոր հինգ փուլերում: Առավելագույն աջակցություն իրականացվել է թեմայի ընտրության և արդյունքների ձևակերպման փուլերում, ինչը կարևոր նախապայման է հետազոտական աշխատանքի հաջող ավարտի համար:

2024-2025 ուսումնական տարում դասախոսների կողմից ուսանողների աջակցությունը հետազոտական աշխատանքի տարբեր փուլերում գնահատվել է ավելի բարձր քան նախորդ տարի, ինչը վկայում է մի շարք որակական դրական փոփոխությունների մասին.

- կրթական միջավայրը դարձել է ուսանողակենտրոն, որտեղ ուսանողները ստացել են շարունակական ուղղորդում և աջակցություն,
- դասախոսների ավելի ակտիվ ներգրավվածություն՝ հատկապես թեմայի ընտրության և եզրակացությունների ձևակերպման փուլերում,
- դասախոսների կողմից շարունակաբար իրականացվող նպատակային խորհրդատվություններ:

Ընդհանուր առմամբ, դասախոսների աջակցության մակարդակի բարելավումը կարելի է դիտարկել որպես հաջողված մեթոդաբանական և կազմակերպչական փոփոխությունների արդյունք, որոնք էականորեն նպաստել են ուսանողների հետազոտական կարողությունների զարգացմանը:

Բաց հարցեր.

1. Հարց. Արդյո՞ք ձեր հետազոտության արդյունքները կարող են կիրառվել, որտե՞ղ և դրա համար ի՞նչ է անհրաժեշտ:

Ուսանողների **82.6%**-ը նշել է, որ հետազոտության արդյունքները կարող են հետազայում կիրառվել: Հետազոտության արդյունքների կիրառման հնարավորությունները բավականին բազմազան են և ընդգրկում են տարբեր ոլորտներ՝ պայմանավորված մասնագիտական առանձնահատկություններով:

Ըստ ուսանողների հետազոտությունները կիրառելի են հատկապես հետևյալ ոլորտներում.

- դպրոցներում ու բուհերում ուսումնական գործընթացի բարելավման համար,
- ծրագրավորման ոլորտում՝ կախված պահանջվող հմտություններից,
- հետազոտական կենտրոններում,
- հասարակական կազմակերպություններում՝ կառավարման ոճերի նրբություններին և հմտություններին տիրապետելու համար,
- բրենդինգի մեջ:

Այսպիսով, հետազոտությունները կարող են ոչ միայն ունենալ կիրառություններ տարբեր ոլորտներում, այլև կարող են աշխատել որպես հարթակ հետագա ուսումնասիրությունների և գիտական գործունեությունների համար:

2. Հարց. Ի՞նչ խնդիրների եք հանդիպել հետազոտական աշխատանքի կատարման ընթացքում:

Հարցման արդյունքում հիմնականում խնդիրներ արձանագրվել են հումանիտար ֆակուլտետի ուսանողների կողմից՝ կապված մասնագիտական գրականության պակասի և հասանելիության, օտարալեզու գրականությունից օգտվելու դժվարությունների, հետազոտական աշխատանք իրականացնելու համար ֆինանսական միջոցներ չհատկացնելու հետ (ՀԳՖ-1 ուսանող):

Մյուս երեք ֆակուլտետներում ուսանողները նշել են, որ առանձնապես բարդ խնդիրների չեն հանդիպել կամ անհաղթահարելի խոչընդոտներ չեն եղել:

➤ Նյութերի և գրականության ձեռքբերման խնդիրներ

- Անհրաժեշտ տեսական նյութերի և գրականության դժվար հասանելիությունը,
- Հայալեզու գրականության և նյութերի սակավությունը,
- Տեղեկատվության սահմանափակությունը:

Բարելավման առաջարկներ.

Հետազոտական աշխատանքների ընթացքում հանդիպած խնդիրները կարող են լուծվել մի շարք տարբերակներով, որոնք կօգնեն բարելավել աշխատանքային ընթացքը և արդյունքները: Հաշվի առնելով առաջացած խնդիրները՝ ներկայացնենք մի քանի առաջարկ:

Գրականության հավաքագրման հարցում կարող են օգնել առցանց գրադարանները, գիտական տվյալների բազաները (օրինակ՝ Google Scholar, JSTOR, ResearchGate), որոնք պարունակում են թե՛ հայերեն, թե՛ օտարալեզու նյութեր: Շատ մասնագիտական հոդվածներ և գրքեր հասանելի են բաց աղբյուրների միջոցով (Open Access), ինչը հնարավորություն կտա օգտվել էլեկտրոնային տարբերակներից:

Գիտական գրադարանների և ինստիտուտների հետ մասնաճյուղի գրադարանի համագործակցությունը կարող է օգնել դժվար հասանելի նյութեր գտնելու հարցում:

3. Հարց. Ի՞նչ առաջարկներ ունեք հետազոտական աշխատանքի կազմակերպման և գնահատման բարելավման համար:

Առավել ակտիվ են արձագանքել հումանիտար գիտությունների ֆակուլտետում, սակայն մեծ մասը պարզապես նշում են՝ «առաջարկներ չունեմ»: Մյուս երեք ֆակուլտետներում առաջարկները շատ սահմանափակ են և հիմնականում դրական գնահատականներ են հնչում:

➤ Առաջարկներ ուսանողների կողմից.

- Ուսանողները ցանկանում են, որ դասախոսները տրամադրեն հավաստի, վստահելի նյութեր, որոնց հիման վրա կարելի է կատարել գիտական հետազոտություն (ՀԳՖ):
- Կան առաջարկներ խթանել խմբային հետազոտությունները, հատկապես համայնքներում (ՀԳՖ):
- Ընտրանք ձևավորող խմբերին տրամադրել ֆինանսական աջակցություն մարդկանց ներգրավելու համար (ՀԳՖ-1 ուսանող):

Առաջարկներ հետազոտական աշխատանքի կազմակերպման և բարելավման համար.

Վերլուծելով բոլոր տրված պատասխանները, կարելի է առանձնացնել մի քանի հիմնական թեմաներ և առաջարկություններ, որոնք կօգնեն բարելավել հետազոտական աշխատանքի կազմակերպումը և գնահատումը:

1. Դասախոսների կողմից նյութերի տրամադրում.

- Առաջարկել դասախոսներին ուղղորդել ուսանողներին օգտվելու թիրախային մեթոդական գրականությունից, առավել հասանելի և հավաստի աղբյուրներից (այդ թվում բաց հասանելիությամբ աղբյուրներից)

2. Խմբային հետազոտությունների խրախուսում.

- Կազմակերպել թեմատիկ խմբային հետազոտություններ, որոնք կներառեն համայնքների այցելություններ, հարցազրույցներ, դիտարկումներ:

ԵՊՀ ԻՄ ԿԲՈԱ բաժին